

èxtra

ARUBA

Segun Tico Croes di AVP

DRAMAMENTO DI SANGER TA DIRIGI CONTRA NOS MES HENDENAN

ORANJESTAD (APA)

Loke realmente ta haci

nos orguyoso, ta duna nos confianza propio, ta duna nos dignidad y ta duna nos honor den bista di mundo, ta e nivel di nos calidad di bida aki na Aruba, asina Tico Croes, parlamentario di AVP a duna di conoce.

Y aki nos ta constatá, cu MEP ta preferá un calidad di bida inferior, pa no perde honor, esta e honor y dignidad, cu en realidad ta e honor y dignidad di e hendenan di MEP, cu descabeyadamente y antidemocráticamente kier forza pueblo pa bai nan tras.

Esaki ta keda demostrá cu loke nos ta tende últimamente tocante dramamento di sanger. Tico Croes ta referi aki na e discurso di Rudy Croes, miembro di MEP na ocasion di despedida di minister Daniel Leo den Staten.

"Nos a yega di tende e zonidonan aki den pasado caba y nos tur sa kiko esaki kier men. Esaki a costa bida di un hoben prometedor, Alo Tromp. E dramamento di sanger aki, no ta dirigi contra ningun grupo den otro paisnan, sino contra nos mes hendenan. Y ora bo ta papia di violencia, ta pasobra bo no tin argumento racional mas y tur loke a sobra, ta amenaza, intimidacion y forza bruto", e miembro di AVP a splica.

AVP ta contraresta e yamada na violencia di MEP cu a palabranan sabio: "El respeto al derecho ajeno, es la paz", palabranan cu e difunto lider di MEP, Betico Croes tabata usa, ora e tabata papia cu nos pueblo. AVP no ta papia di sanger y violencia, sino di paz, harmonia, union y seguridad. Esakinan mester ta e base di progreso pa nos pueblo y ta solamente riba e base aki, nos lo por construi un Aruba sólido, cu por garantizá e calidad di bida halto cu nos tur conocé y kier mantené y expandé pa nos mes y nos jiunan.

E yamada di MEP pa violencia, ta un yamada na division, odio, rencor, venganza, lágrima, sufrimento, inestabilidad y na "high risk", pero tambe na un soño y oportunidadnan perdi.

E tendencia actual na Aruba a tuma un rumbo peligroso; na unda no tin respet pa otro su derechonan mas. Y nos sa cu e tendencianan aki, den un independencianan, por conduci na un dictadura cu nos ningun ta deseá. Cu awor mes no tin respet pa derechonan di otro, ta con lo ta na 1996? Ta con lo para

cu e "futuro briyante", ora ta papia awor caba di dramamento di sanger?

Ya caba nos ta mira consecuencia di un gobernacion irresponsabel, mecos cu den añanan 1984 y 1985. Ya caba amenazanan ta skeiro contra prensa, contra clero, sindicato, sector comercial, contra empleadonan público. Atrobe ta huzga ta ken ta Arubiano, a base di antepasadonan. Atrobe ta mira arbitrariedad den trato, persecucion y favoritismo político na gran escala. Atrobe ta mira un derroche di placa di pueblo, cu e amenaza, cu pronto medidanan lo mester worde tumá riba lomba di pueblo, pa bolbe gasta e placa cu LAGO lo por bai paga Aruba.

Tres año largo pueblo a experenciá un otro situacion, caminda tabatin paz y harmonia, por a expresá opinion libremente, sin miedo pa un bisina tendebo, por a haya un trabao den gobierno, un permiso di taxi, beca, onder-

stand, karchi di dokter, tereno pa traha cas, etc., irrespecto bo color político of ken bo ta. Aruba mester ta un cas, caminda ta reina paz, amor, harmonia y progreso. Y ainda no ta laat pa para e desaroyo negativo y destructivo aki.

Finalizando su charla, Tico Croes a bisa, cu AVP ta di opinion, cu ta e pueblo di Aruba tin e último palabra encuan to su futuro estructura estatal y cu ta nos pueblo mester tuma un decision directo, mediante un referendum, mas lihé posibel, pa dicidi si nos ta mantené nos Status Aparte, of cu nos ta bira independiente na 1996. AVP ta rechazá den un forma categórico e ambiente cu MEP ta creando, pasobra mientras nos pueblo ta anhelando paz, MEP ta creando violencia. Mientras nos mester di union, MEP ta creando division y discordia y mientras pueblo mester di seguridad, MEP ta creando atrobe, inseguridad.